

The Electronic Manipulus florum
www.manipulusflorum.com

Pena siue punitio x
cum fonte primo

Horrendo modo

fit miseris mors sine morte, finis
sine fine, defectus sine defectu quia
et mors semper uiuit, et finis semper
incipit, et deficere defectus nescit.

Mors perimit et non extinguit, dolor
cruciat sed nullatenus pauorem fugat,
flamma comburit sed nequaquam
tenebras excutit.

Gregorius ibidem (libro IX. moralium).

Horrendo igitur modo
erit tunc reprobis dolor cum formidine,
flamma cum obscuritate. Sic sic uidelicet
a damnatis sentiri pondus summae
aequitatis debet, ut qui a uoluntate
conditoris nequaquam sunt ueriti
discrepare dum uiuerent, in eorum
quandoque interitu ipsa a suis
qualitatibus etiam tormenta discordent,
quatenus quo se impugnant, cruciatus
augeant et cum uarie prodeunt
multipliciter sentiantur. Quae tamen
suppicia in se demersos et ultra uires
cruciant, et in eis uitae subsidium
extinguentes seruant, ut sic uitam
terminus puniat; quatenus semper sine
termino cruciatus uiuat quia et ad finem
per tormenta properat, et sine fine
deficiens durat.

Fit ergo miseris mors sine morte, finis
sine fine, defectus sine defectu, quia
et mors uiuit et finis semper
incipit, et deficere defectus nescit.

Quia igitur et
mors perimit et non exstinguit; dolor
cruciat, sed nullatenus pauorem fugat;
flamma comburit, sed nequaquam
tenebras discutit;
quantum per notitiam praesentis uitae
colligitur, suppicia ordinem non habent,
quae non suam per omnia qualitatem
tenent.

Gregorius Magnus, *Moralia in Job*, 9, 66
(CCSL 143, M. Adriaen ed., p.528,
ll.13-31).